

BACCALAURÉAT GÉNÉRAL - SESSION 2011

ÉPREUVE	OCCITAN (Languedocien) LV.2	
SÉRIE S	Durée : 2 heures	Coefficient : 2
Ce sujet comporte 3 pages numérotées de 1/3 à 3/3		

L'usage de la calculatrice et du dictionnaire n'est pas autorisé.

Dès que ce sujet vous est remis, assurez-vous qu'il est complet.

Barème	
Compréhension du texte	10
Expression personnelle	10

La pana

Tot èra planièr al país de Cocanha. Ausissiatz pas mai parlar dels miseroses, dels paures, de las injustícias e cadun i trobava son compte. I aviá pas mai de libres a l'escòla, pas mai de quasèrns, d'estilòs, d'ortografia, pas mai de poèmas, donc pas mai de poètas ! Pas mai de libres, donc pas mai d'escrivans. Tot anava pel melhor !

5 Solament, aquí qu'un ser la television e la ràdiò se calèron. La pana ! Sul pic, lo Rei Piotàs I^{er} convoquèt los ministres. Que diable i podiá aver ? E la pana s'anonciava longa. Lo telefòn esquilava de contunh que las gents protestavan. A tot pèdre, caliá evitar que manifestèsson. Al cap de qualques jorns, la languina comencèt d'agantar la populacion. Que far un còp tornats del trabalh ? Lo fenestron¹ èra negre e la radiò muda ! La languina creissiá
10 e la demingra² començava de rosigar los esperits. Lo quite Rei e sa familha se languissián. Far als cavalons, a las cartas, las partidas de « òc ni non », res los gardava pas de languir. Mas lo Rei èra obligat d'èsser un exemple per totes, alavetz, s'esforçava de far lo qu'es totjorn urós e sorisent. Representava oficialament lo bonaür e la serenitat.

15 « Majestat, tot va fòrt mal, es la catastròfa. Avèm de mond qu'organizan d'amassadas las nuèches, de mond que s'acampan dins de cavas, d'apartaments o pels bòsques... bramèt lo cap de la polícia en passant lo portal del palais. E tot aquò, per se contar d'istòrias !

- E alavetz, passan lo temps !

20 - Majestat, es plan pus grèu qu'aquò ! S'amassan per escotar d'insurgents que legisson de libres a votz nauta ! de libres qu'avián resconduts dins los trastes. De romans, de contes, de poèmas, de libres d'istòria... Los que sabon escriure còpian de libres pels autres. Avèm ausit dire que d'autors se meton a escriure d'istòrias novèlas. I a un libre que se passeja tanben, manuscrit, fotocopiàt, e dins aquel libre, vos critican, Majestat.

- E cossí s'apèla, aquel libre ?

25 - « Tuem la languina ! », es lo títol d'aquel libre, respondèt, moquet, lo cap de la polícia. E lo Rei, tot emmaliciat, se metèt a córrer e a cridar per tot lo palais :

« O an tot, o lor ai tot balhat, lo bonaür, la tranquillitat e van cercar d'istòrias dins los libres ! Son pas que de somiaires, de trucalunas, de pantaisaires. Los te vau tornar metre al trabalh, ieu, e lèu fach ! »

30 Arribat a l'autre cap del palais, dins sos apartaments, demorèt mut, incapable de dire un mot. Sabètz çò qu'aviá vist ?

Lo seu pichòt filh se sesiá sul lièch, tranquillòt, un libre a la man.

« Diga, pichòt, sabes pas qu'es interdich, aquò ?

35 - Mas l'ai trobat jol pè del lièch, que fasiá còta³. E l'ai dubèrt, per ne legir qualques paginas, per tuar lo temps e far passar la languina. »

¹ Lo fenestron... de la television

² La demingra : lo lagui, las idèas negras

³ Còta : cale

I – COMPREHENSION

1. Lo tèxt descriu un país

- en guèrra
- utopic
- dins la misèria

Donatz la bona resposta e trobatz tres elements dins lo tèxt per la justificar.

2. Lo jorn de la pana, las gents

- manifestan
- se calan
- romegan

Trobatz la bona resposta e citatz la frasa qu'o permet d'afortir. Explicatz aquesta reaccion de las gents.

3. Cossí comprenètz la frasa seguenta :

« Al cap de qualques jorns, la languina comencèt d'agantar la poblacion » ?

4. Cossí se pòt explicar l'intervencion de la polícia dins l'istòria ?

5. Cossí s'acaba l'istòria ? Que ne pensatz ?

6. Reviratz de « Que far un còp tornats » (l.8) fins a « res los gardava pas de languir » (l.11)

II – EXPRESSION PERSONNELLE

Avètz la causida entre aqueles dos subjèctes :

1. Qué se pòt pensar de la pana ? Es quicòm de bon o de marrit per la poblacion ? (150 a 180 mots)
2. Un país sens libre seriá lo país de Cocanha per vos ? Donatz un vejaire personal e argumentat. (150 a 180 mots)